

الرد على قصة الأديان ج ٣ - هل فكرة الأديان خطأ بمجرد النظر

بسم الله الرحمن الرحيم

هل فكرة الأديان خطأ بمجرد النظر

للباحث/ أبو المنتصر محمد شاهين التّاعب



السلام عليكم ورحمة الله وبركاته.

هنكمل رد على الأفكار الموجودة في فيديو (قصة الأديان) لكن قبل ما نكمل أنت غالباً مش مشترك في القناة اضغط على الزر الأحمر واضغط على علامة الجرس عشان تحيلك كل الإشعارات بكل حلقاتنا الجديدة.

التصور الإسلامي لنشأة الأديان أولاً فكرة الفطرة التي فطر الله الناس عليها؛ إن الإنسان أصلاً بطبعه فيه النزعة الدينية (النزعة الغائية)، النزعة اللي هو يدرك في ذاته أن هو لم يأتي بنفسه إلى الوجود - هو يدرك هذا بداهة -، فبيبتدي يسأل من أين جئت ولماذا أنا هنا وإلى أين أذهب بعد الموت، ويعيش طول حياته لا يستطيع أن ينفك عن البحث على إجابات لهذه الأسئلة، والإلحاد ببساطة هو أسهل إجابة ممكنة اللي هي إجابة ليس لها أي

مسئوليات وبتخلي الإنسان إذا أراد أنه يبرطع في الدنيا دي زي ما هو عايز ويعيشها بالطول والعرض؛ لأن مفيش إله جابنا ولا فيه غاية من وجودنا ولا فيه حد هيحاسبنا بعد موتنا فخلاص؛ لكن الإجابة الدينية هي الإجابة - إجابة الإسلام أو على الأقل الأديان السماوية - اللي بتقول إن فيه إله خلقنا وأوجدنا على الأرض وإن احنا مكلفين بوحى لازم نطيع كل ما أمره الله عز وجل - نطيع الله عز وجل في كل ما أمره وننتهي عن كل ما نهى عنه وزجر -؛ فكرة التكليف وإن أنت يوم القيامة ستحاسب، فبالتالي أثقل

إجابة على الإنسان - ودي فكرة الأمانة وحمل الأمانة وهي فعلاً ثقيلة - أثقل إجابة هي إجابة الأديان؛ إن أنت مكلف في الدنيا، وحي وأوامر ونواهي وكذا، ولا تعيش في الدنيا تبرطع وتعمل الي أنت عايزه أو الي أنت شايفه صح فيه دين بيوجهك للصيح والغلط مش كذا وبس دا بعد الموت فيه إله هيحاسبك على كل حاجة أنت عملتها في ديتك، لكن أسهل إجابة (هو احنا هنروح فين بعد الموت؟ من نفس المكان الي جيت منه قبل ما تيجي)؛ أنت لو كنت درست أنت جيت إزاي - نشأة الحياة ونشأة الإنسان - بجدية؛ كنت أدركت إن نشأة الحياة دليل قطعي على وجود إله، وإن الإله الي نشأ الحياة ونشأ الإنسان هو الي هيحاسب الإنسان بعد موته. نشأة الحياة تعقيد الخلية الأولى، والمعلومات الجينية، والوظائف الحيوية دراسة هذه الأمور الثلاثة تقول قطعاً إن الحياة لا يمكن أن تنشأ محض صدفة، لا يمكن لا بحساب رياضيات ولا بالوقت المتاح، والمعلومات لا تنشأ قطعاً - ولا شك - المعلومات لا تنشأ نتيجة فوضى وعشوائية مستحيل مستحيل، والمعلومات تدل على كائن عليم، مش بس معلومات دي مشفرة والوظائف الحيوية بتفك التشفير وتنسخ وتعمل، ومدى التعقيد الرهيب؛ أعقد شيء الإنسان اطلع عليه في وجوده على الأرض: الخلية الحية، لو كنت أدركت فعلاً أنت جيت منين والحياة نشأت إزاي؛ كنت عرفت إن الي أنشأك أول مرة هيعيدك مرة ثانية وهتقف

أمام يديه للحساب وهيحاسبك على كل حاجة أنت عملتها في دينتك، لكن أسهل حاجة احنا رايجين للفناء مفيش حساب مفيش ثواب مفيش عقاب.

لو كنت فكرت في الحاجات الي أنا قلتها الوعي والقيمة والقدرة على الفهم والنزعة الغائية والمبادئ العقلية الأولية والمنطق والقدرة على التخيل وتذوق الجمال والتفكير المنطقي المجرد والضمير والنزعة الأخلاقية والغريزة وحرية الإرادة لو كنت فكرت في كل دا - فيما يخص نشأة الإنسان - ودرست فعلاً هل نظرية التطور قادرة على تفسير نشأة الإنسان؛ كنت أدركت إن كل هذا دليل على إن الله عز وجل هو الذى خلق الإنسان بأي طريقة وبأي كيفية، وإن الي خلقك هيحاسبك عرفنا مين إن هو هيحاسبنا؛ لأنه أنزل كتب وبعث أنبياء ورسّل أخبرونا بأن فيه حساب بعد الموت. احنا بنقدر نعرف إن فيه خالق ببداهة العقول بالتفكير في نشأة الكون ونشأة الحياة ونشأة الإنسان والتفكير في ضبط الكون ومدى إحكامه ومدى إتقانه؛ لكن هنعرف مين إن فيه حساب؟ بالوحي، إن الله عز وجل لم يخلقنا عبثاً لكن احنا هنا بسبب اختبار بنعيشه على الأرض وربنا هيحاسبنا يوم الحساب هيبعثنا من الموت وسنقف بين يديه للحساب.

فيه نقطة مهمة عايز أقولها إن التصور الإسلامي لنشأة الأديان دا شيء فريد؛ الإسلام بس هو الي عنده تصور لنشأة الأديان الأخرى، الإسلام هو الدين الوحيد الي عنده تصور

لنشأة الأديان الأخرى ولتاريخ الأديان من بداية وجود الجنس البشري. لا المسيحية ولا اليهودية ولا أي دين آخر يوضع تصور لنشأة الدين من بداية الجنس البشري ونشأة الأديان الأخرى، فيه نصوص ساشير إليها - وأنا يمكن أشرت إليها قبل كدا-، الله عز وجل في الحديث القدسي في صحيح مسلم: "وأني خلقت عبادي حنفاء كلهم وإنهم أتتهم الشياطين فاجتالتهم عن دينهم وحرمت عليهم ما أحللت لهم وأمرتهم أن يشركوا بي ما لم أنزل به سلطاناً"؛ دا الحديث في صحيح مسلم أنا بأقرأ من شاشة أمامي عشان أتذكر. يبقى التصور الإسلامي إن الأصل إن فيه إله واحد وإن فيه دين واحد، هذا الإله جعل الناس من بداية آدم عليه السلام يلتزموا بهذا الدين ايه بقى هو هذا الدين؟ الله عز وجل يقول في سورة البقرة وسورة طه: {قُلْنَا اهْبِطُوا مِنْهَا جَمِيعًا فَإِمَّا يَأْتِيَنَّكُمْ مِنِّي هُدًى فَمَنْ تَبَعَ هُدَايَ فَلَا خَوْفٌ عَلَيْهِمْ وَلَا هُمْ يَحْزَنُونَ} [البقرة: ٣٨]، وفي سورة طه: {قَالَ اهْبِطَا مِنْهَا جَمِيعًا بَعْضُكُمْ لِبَعْضٍ عَدُوٌّ فَإِمَّا يَأْتِيَنَّكُمْ مِنِّي هُدًى فَمَنْ اتَّبَعَ هُدَايَ فَلَا يَضِلُّ وَلَا يَشْقَى} [طه: ١٢٣]، فالتصور الإسلامي ايه للدين؟، إن الدين: ما ندين به لله عز وجل، احنا مكلفين بـ ايه؟ إن ربنا هينزل علينا هدى -وحي- من الله الي يتبع؛ {فَلَا خَوْفٌ عَلَيْهِمْ وَلَا هُمْ يَحْزَنُونَ}، والي يتبع؛ {لَا يَضِلُّ وَلَا يَشْقَى}، فبالتالي الإسلام هو المبدأ دا؛ المبدأ العقائدي الإيمان بإله واحد متصف بصفات الكمال منزّه عن صفات

النقص والتوحيد اليي المسلمين ييشرحوه على طول -توحيد الأسماء والصفات، وتوحيد الربوبية، وتوحيد الألوهية- المبدأ دا عن الله، والأصل بقى في التكليف؛ إن ربنا هينزل علينا وحي عن طريق أنبياء ورسل اليي هيتبع هيدخل الجنة والي مش هيتبع هيدخل النار، دا الدين الإسلامي في أصله اليي جاء به كل الأنبياء والمرسلين اليي جاء به كل الأنبياء والمرسلين. القرآن الكريم بيوضح إن من بداية إبراهيم عليه السلام أبو الأنبياء إبراهيم عليه السلام كان مسلماً وأولاده إسماعيل وإسحاق كانوا مسلمين وأبناء إسحاق عليه السلام يعقوب والأسباط كانوا مسلمين وسيدنا موسى كان مسلم وأتباعه مسلمين وسيدنا عيسى كان مسلم وأتباعه مسلمين وسيدنا محمد كان مسلم وأتباعه مسلمين؛ هي فكرة واحدة وتكليف واحد ومبدأ واحد من أول آدم لغاية سيدنا محمد كلهم جاؤوا بنفس المبدأ، عقيدة في الله واحدة لا تتغير -عقيدة التوحيد-، والمبدأ الأساسي طاعة الوحي؛ النبي بيأتي بالوحي والرسول بيأتي بالوحي والكتاب والشرعية اليي يتبع اليي جاء عن طريق الأنبياء والرسل هيدخل الجنة والي ما يتبع هيدخل النار أمر في غاية البساطة. الآيات التي كانت تتكلم إن سيدنا إبراهيم وسيدنا إسماعيل كانوا مسلمين في سورة البقرة: {رَبَّنَا وَاجْعَلْنَا مُسْلِمِينَ لَكَ وَمِنْ ذُرِّيَّتِنَا أُمَّةٌ مُسْلِمَةً لَّكَ} [البقرة: ١٢٨]، وبعديها بكم آية: {إِذْ قَالَ لَهُ رَبُّهُ أَسْلِمَ قَالَ أَسْلَمْتُ لِرَبِّ الْعَالَمِينَ} [البقرة: ١٣١]، الآيات أيضاً

الخاصة بإبراهيم عليه السلام: {وَوَصَّى بِهَا إِبْرَاهِيمُ بَنِيهِ وَيَعْقُوبُ يَا بَنِيَّ إِنَّ اللَّهَ اصْطَفَى لَكُمُ الدِّينَ فَلَا تَمُوتُنَّ إِلَّا وَأَنتُمْ مُسْلِمُونَ، أَمْ كُنْتُمْ شُهَدَاءَ إِذْ حَضَرَ يَعْقُوبَ الْمَوْتَ إِذْ قَالَ لِبَنِيهِ مَا تَعْبُدُونَ مِن بَعْدِي قَالُوا نَعْبُدُ إِلَهَكَ وَإِلَهَ آبَائِكَ إِبْرَاهِيمَ وَإِسْمَاعِيلَ وَإِسْحَاقَ إِلَهًا وَاحِدًا وَنَحْنُ لَهُ مُسْلِمُونَ} [البقرة: ١٣٢-١٣٣]، سيدنا إبراهيم مذكور عنه في القرآن: {مَا كَانَ إِبْرَاهِيمُ يَهُودِيًّا وَلَا نَصْرَانِيًّا وَلَكِنْ كَانَ حَنِيفًا مُّسْلِمًا وَمَا كَانَ مِنَ الْمُشْرِكِينَ} [آل عمران: ٦٧]؛ ففيه بيان إن الأديان الأخرى انحرف عن الوحي الي الله عز وجل نزله، وإن النصرانية - كما هي الآن - فيها شرك وكفر وإن اليهودية - كما هي الآن - فيها شرك وكفر وإن كل الأديان الثانية فيها شرك وكفر؛ لكن فيه نقطة في غاية الأهمية إن الإسلام هو الدين الوحيد الي مدرك وجود الأديان الأخرى والي مدرك إن فيه منها فيها صح وفيها غلط وفيها مسائل بتوافق الإسلام وفيها مسائل بتخالف الإسلام، والأمردا الإسلام هو الدين الوحيد الي يتعامل مع الأديان بهذه الحيادية وبهذه النظرة التاريخية العميقة؛ إن الأصل الله عز وجل أنزل وحي على الأنبياء والرسل بنفس المبادئ وبنفس المسمى (الإسلام)، وإن كل أتباع الأنبياء مسلمين؛ لكن حصل انحراف كذا وكذا وكذا، وفكرة عبادة الأصنام كيف نشأت في سورة نوح: ود وسواع ويغوث ويعوق ونسرا، وإن دول كانوا تماثيل لناس أبرار وكويسين ومع الوقت الشيطان ضحك عليهم وخلاهم

يعبدوا هذه الأصنام، فالإسلام عنده تصور أصل كبير إن ربنا أنزل وحي من بداية آدم - من بداية نشأة الجنس البشري - والإنسان على التوحيد، والأديان الأخرى ظهرت بسبب إن الشياطين اجتالت الناس عن دينهم، وإن هذه الأديان - بغض النظر هي أقرب للأصل السماوي وإلا أبعد خالص - إلا إني أنا بقدر أبرر وجود الشبه ووجود الاختلاف؛ الشبه لأن الأصل في الدين عند الإنسان التوحيد والوحي الي الله عز وجل أنزله، والشبه لأن الإسلام هو الدين الوحيد الي يقول إن الله عز وجل أرسل أنبياء ورسلك للبشرية {وَإِنْ مِنْ أُمَّةٍ إِلَّا خَلَا فِيهَا نَذِيرٌ} [فاطر: ٢٤]، {وَمَا كُنَّا مُعَذِّبِينَ حَتَّى بَعَثَ رَسُولًا} [الإسراء: ١٥]، رُسل الله عز وجل يقول: {مِنْهُمْ مَّنْ قَصَصْنَا عَلَيْكَ وَمِنْهُمْ مَّنْ لَّمْ نَقْصُصْ} [غافر: ٧٨]، الأحاديث الي بتقول إن عدد الأنبياء والرسل أكثر بكثير جدًا من المذكورين في القرآن، القرآن يذكر أنبياء ورسلك من شبه الجزيرة العربية ومن غيرها - مش بس من بني إسرائيل -؛ فبالتالي هذا التصور الإسلامي إن الأصل في الإنسان دين واحد ربنا أنزله من أيام آدم والمبدأ واحد من أيام آدم والتوحيد واحد من أيام آدم وإن ربنا بعث أنبياء ورسلك في كل الأقوام.

فبالتالي الي يقولك الزرادشتية طيب ايه المشكلة في الزرادشتية؟ ايه المشكلة إن الزرادشتية يبقى فيه شبه بينها وبين الإسلام تحديدًا، الوقتي احنا بنعرف إن دعوة الأنبياء دي فيها



أصول كبرى، الأصول الكبرى دي: إن فيه إله خلق العالم، وخلق الإنسان، وإن العالم مش أزي ولا حاجة، العالم حادث -الزرادشتية تقول بهذا- وبعدين إن الإنسان مكلف في الأرض مكلف لأداء مهمة معينة وفيه حساب بعد الموت وإما جنة وإما نار - والزرادشتية تقول بهذا- إذا المبادئ الكبرى للدين الإسلامي للدين الي ربنا أنزله من أيام آدم لغاية سيدنا محمد الزرادشتية بتقول بيها مع وجود وثنيات وكفريات كثيرة جداً جداً في الزرادشتية نبرر إزاي الشبه؟ نحن عندنا تصور لتاريخ الأديان يجوز إن زرادشت دا ممكن يكون نبي، ايه المشكلة؟ ما دام هو جاء بالأصول الكبرى الي الأنبياء بيحوا بيها، أصل أنت محسنني إن الشبه الي أنت بتكلم فيه دا شبه بسيط دا بيقول إن فيه إله خلق الكون، والله؟! دا بيقول إن فيه حساب وجنة ونار لا والله؟! المفروض إن لو أنت عايز تحسس الناس إن سيدنا محمد صلى الله عليه وسلم نقل من الزرادشتية -بغض النظر إزاي وامتى وفين- يعني كل المستشرقين لما بيحوا يتكلموا على إن الإسلام نقل كله بيقول يهودية ومسيحية؛ لأن هما دول الي كانوا معاصرين للنبي ودول الي كان فيه تلاقي ثقافي كبير جداً ما بينهم وما بين كفار قريش والعرب بشكل عام، ففيه وجهة نوعاً ما إن أنت تقول إن الإسلام تأثر باليهودية والمسيحية؛ لكن الزرادشتية النبي في حياته قابل كام واحد من الفرس -يعني من بلاد فارس- عشان ينقل مالزرادشتية، يعني أنت بتقول

كلام محدش غيرك أصلاً فُكر فيه كشبهة بتطعن فيها على الإسلام. لو احنا جينا نبصّ على التفاصيل الي أنت بتقول عليها: "الصلاة الزرادشتية ٥ مرات، ووضوء وتشهّد"، ٥ مرات وضوء وتشهّد! طيب دوّر كدا على النت على صفة الصلاة الزرادشتية، دوّر كدا على النت عن الوضوء في الزرادشتية، دوّر كدا على النت عن الي أنت بتدّعيه تشهّد في الزرادشتية وحاول تجيب أي وجه شبه ما بينها وبين الإسلام! يعني كون إن هم شبه الإسلام في إن هما عندهم ٥ صلوات -ودا أمر مش مجمع عليه عند علماء الأديان- يبقى خلاص الإسلام خد فكرة الـ ٥ صلوات من الزرادشتية؟! طيب أنا بتنزل معاك وبقول: إن دا ممكن يكون من بقايا حق عند الزرادشتية من أصل وحي من الله؛ لكن أصلاً كون إن المسلمين استقروا على خمس صلوات في اليوم واللييلة -كفرائض واجبة- الأمر دا مكش من بداية الإسلام، وله قصة معروفة والإسراء والمعراج متوثّق عند المسلمين ليه احنا بنصلي خمس صلوات في اليوم واللييلة، ملهاش أي علاقة لا بمسيحية ولا يهودية ولا بزرادشتية ولا أي ديانة على وجه الأرض تانية.

ياريت الناس خصوصاً الملحدين واللادينيين حاولوا تفكروا شوية مش بس مع أطروحات المؤمنين أصحاب الأديان لكن مع أطروحات الناس الي بيملوا دماغكم كذب وتخريف. أنا عايز أختم الفيديو بنقطة معينة القصة الي أنا بحكيها عن نشأة الأديان

في التصور الإسلامي مختلفة تمامًا عن نشأة الأديان أو قصة الأديان في التصور الإلحادي التطوري البطيخي بنيجي نسأل نفسنا سؤال أنت ليه كمسلم مؤمن بالقصة دي؟ وأنت ليه كملحد مؤمن بالقصة دي؟ وياه هي الأدلة على صدق القصة دي؟ وياه هي الأدلة على القصة دي؟ أنا اختصارًا بقول: أنا مؤمن بالقصة الدينية لأن أنا بقدر أثبت إن القرآن الكريم كلام الله، وبقدر أثبت إن سيدنا محمد صلى الله عليه وسلم رسول من عند الله، وفيه نقطة بقى في غاية الأهمية قصة نشأة الأديان في التصور الإسلامي قصة الأديان في التصور الإسلامي لها قوة تفسيرية (Explanatory Power) رهيبة، مجرد أصلاً إن أنت تبحث وتشوف هل فعلاً الإسلام هو الدين الوحيد اللي له تصور للأديان ونشأة الأديان المختلفة، هل الإسلام هو الدين الوحيد اللي له تصور لإزاي الأديان المختلفة فيها حق وفيها باطل؛ فيه أديان الإسلام بيحكم عليها أنها كلها باطلة يعني أتباعها لا يمكن أبداً يوردوا على جنة زي المجوس اللي أصل ديانتهم الثنائية وتعدد الآلهة أوزي الوثنيين اللي يعبدوا الأصنام، فيه ديانات تانية الإسلام قبل بعثة النبي محمد صلى الله عليه وسلم بيحكم على أتباعهم إن فيه منهم هيدخل الجنة، الإسلام هو الدين الوحيد اللي عنده التصور دا؛ إن أنا بقول إن فيه مسيحيين قبل بعثة النبي محمد صلى الله عليه وسلم ممكن يدخلوا الجنة، وإن فيه يهود قبل بعثة عيسى عليه السلام هيدخلوا الجنة، الحديث اللي

يقول: "إن الله عز وجل اطلع على أهل الأرض فمقتهم عربهم وعجمهم إلا بقايا من

أهل الكتاب"، ففيه بقايا كانوا على الحق سواء من العرب الأوائل القدامى الي بُعث فيهم النبي محمد صلى الله عليه وسلم أو بقايا من أهل الكتاب ناس فضلوا على الديانة الي جاء بيها أنبيائهم من غير تحريف.

أنا هكتفي بهذا القدر في هذا الفيديو عايز الناس تفكر في كل الي أنا طرحته دا، ونتقابل في فيديو قادم نكمل تعليق ورد على أفكار تانية مطروحة في فيديو (قصة الأديان). لو كان الفيديو عجبكم لايك وشير ولا تنسى تعمل اشتراك في القناة دوس على الزر الأحمر وعلامة الجرس عشان تجيلك كل إشعارات الحلقات الجديدة. لا تنسوني من صالح دعائكم والسلام عليكم ورحمة الله وبركاته.

احرص على متابعة كل جديد من قناة الدعوة الإسلامية

للاشتراك في القناة Subscribe اضغط على هذا الرابط <https://goo.gl/9Zhhpt>

لمشاهدة المقطع على اليوتيوب: <https://goo.gl/mEf8Xt>

وإذا حاز الفيديو على إعجابك قم بعمل إعجاب Like ومشاركة Share

ولا تنس الاطلاع على الفيديوهات القديمة، سواء الدينية أو التقنية

=====

<https://www.patreon.com/alta3b>

=====

للتواصل:

واتساب ٠٠٢٠١٠٠٥٦٥٤٢٠٧

آسك <https://ask.fm/alta3b>

تويتر <https://twitter.com/alta3b>

التابع فيسبوك <https://www.fb.com/alta3b>

الدعوة فيسبوك <https://www.fb.com/eld3wah>

مدونة التابع <https://www.alta3b.wordpress.com>

الدعوة يوتيوب <https://www.youtube.com/eld3wah>

مع تحيات فريق مشروع التفريغ ☺  
لمزيد من المعلومات الرجاء زيارة هذا الرابط:

<http://www.shbaboma.com/vb/forumdisplay.php?f=87>